

ცაგერის მუნიციპალიტეტის მერის სათათბირო ორგანოს - სამოქალაქო მრჩეველთა საბჭოს
დებულება

თავი პირველი

ზოგადი დებულებები

მუხლი 1. მოქმედების სფერო

ეს დებულება განსაზღვრავს ცაგერის მუნიციპალიტეტის მერის სათათბირო ორგანოს სამოქალაქო მრჩეველთა საბჭოს (შემდგომ - საბჭო) უფლებამოსილებებს, მისი შექმნისა და საქმიანობის წესს.

მუხლი 2. საბჭოს ცნება

საბჭო არის ცაგერის მუნიციპალიტეტის მერის სათათბირო ორგანო, რომელიც იქმნება ადგილობრივი თვითმმართველობის განხორციელებაში მოქალაქეთა მონაწილეობის ხელშეწყობის, ცაგერის მუნიციპალიტეტის მერის საქმიანობის ეფექტურობის გაზრდის მიზნით.

მუხლი 3. საბჭოს საქმიანობის ძირითადი პრინციპები და მიზნები

1. საბჭოს პრინციპებია:

- ა) კანონიერება;
- ბ) თანასწორობა;
- გ) საჯაროობა;
- დ) მიუკერძოებლობა;
- ე) კოლეგიურობა;
- ვ) საჯარო და კერძო ინტერესების პროპორციულობა.

2. საბჭოს მიზანია:

- ა) ადგილობრივი თვითმმართველობის განხორციელებაში მოქალაქეთა მონაწილეობის უზრუნველყოფა და ცაგერის მუნიციპალიტეტის მერის საქმიანობაში საზოგადოებრივი ჩართულობის გაზრდა;

ბ) ცაგერის მუნიციპალიტეტის მოსახლეობასა და ცაგერის მუნიციპალიტეტის მერს შორის მჭიდრო ურთიერთკავშირის უზრუნველყოფა;

დ) ცაგერის მუნიციპალიტეტის მერის საქმიანობის ეფექტურობისა და გამჭვირვალობის უზრუნველყოფა;

ე) მოქალაქეთა ინტერესების წარმოდგენა და დაცვა ცაგერის მუნიციპალიტეტის მერის საქმიანობაში.

მუხლი 4. საბჭოს სტრუქტურა და შემადგენლობა

1. საბჭოს შემადგენლობაში შედიან ცაგერის მუნიციპალიტეტის ტერიტორიაზე რეგისტრირებული მეწარმე იურიდიული პირების, არასამთავრობო ორგანიზაციების და მუნიციპალიტეტის მოსახლეობის წარმომადგენლები.

2. საბჭო შედგება 12 (თორმეტი) წევრისგან.

3. საბჭოში ერთი სქესის წარმომადგენელთა რაოდენობა 1/3-ზე ნაკლები არ უნდა იყოს. საბჭო უფლებამოსილი არ არის, თუ დარღვეულია ამ პუნქტის მოთხოვნა.

4. საბჭო, თავისი საქმიანობის წარმართვის და მისი ხელშეწყობის მიზნით, საკუთარი შემადგენლობიდან ირჩევს საბჭოს თავმჯდომარეს.

5. საბჭო სხდომის ორგანიზების, სხდომის ოქმის შედგენის, გაფორმების და სხვა ორგანიზაციული ფუნქციების განსახორციელებლად საკუთარი შემადგენლობიდან ირჩევს საბჭოს მდივანს.

თავი მეორე

საბჭოს უფლებამოსილებები და შემადგენლობის დამტკიცების წესი

მუხლი 5. საბჭოს უფლებამოსილებები

1. საბჭო უფლებამოსილია:

ა) წელიწადში ერთხელ განიხილოს ცაგერის მუნიციპალიტეტის მერის მიერ გაწეული საქმიანობის შესახებ ინფორმაცია;

ბ) მოამზადოს, განიხილოს და ცაგერის მუნიციპალიტეტის მერს წარუდგინოს წინადადებები მუნიციპალიტეტში არსებული სოციალურ-ეკონომიკური პრობლემების და მათი მოგვარების შესაძლო გზების შესახებ;

გ) ცაგერის მუნიციპალიტეტის უფლებამოსილებას მიკუთვნებულ საკითხებზე მოაწყოს დისკუსიები და საზოგადოებრივი განხილვები;

დ) მონაწილეობა მიიღოს ცაგერის მუნიციპალიტეტის მოსახლეობის გამოკითხვების და საზოგადოებრივი განხილვების ჩატარების ორგანიზებაში;

ე) სხდომაზე მოიწვიოს და მოუსმინოს ცაგერის მუნიციპალიტეტის სტრუქტურული ქვედანაყოფების ხელმძღვანელებსა და ცაგერის მუნიციპალიტეტის მიერ დაფუძნებული სამეწარმეო და არასამეწარმეო იურიდიული პირების ხელმძღვანელებს;

ვ) მონაწილეობა მიიღოს ბიუჯეტის მომზადების პროცესში და განიხილოს ცაგერის მუნიციპალიტეტის ბიუჯეტის პროექტი საკრებულოსთვის მის წარდგენამდე;

ზ) განიხილოს ცაგერის მუნიციპალიტეტის სივრცითი დაგეგმარების დოკუმენტების პროექტები;

თ) განიხილოს ცაგერის მუნიციპალიტეტის გეოგრაფიული ობიექტების სახელდების შესახებ წინადადებები;

ი) განიხილოს სხვა მნიშვნელოვანი ადმინისტრაციულ-სამართლებრივი აქტების პროექტები;

კ) განიხილოს მუნიციპალიტეტის ინფრასტრუქტურული და სოციალური პროექტები;

ლ) განახორციელოს საბჭოს დებულებით დადგენილი სხვა უფლებამოსილებები.

2. ცაგერის მუნიციპალიტეტის მერი ამ მუხლის პირველი პუნქტის „ვ“-„კ“ ქვეპუნქტებით გათვალისწინებული სამართლებრივი აქტების პროექტები /წინადადებები.

მუხლი 6. საბჭოს შემადგენლობის დამტკიცების წესი

1. საბჭო იქმნება ცაგერის მუნიციპალიტეტის მერის უფლებამოსილების ვადით.

2. ცაგერის მუნიციპალიტეტის მერი უფლებამოსილია თავად დააკომპლექტოს საბჭოს შემადგენლობა ან/და გამოაცხადოს საბჭოს წევრობაზე განცხადებების მიღება ამ მუხლის მე-5 და მე-9 პუნქტების შესაბამისად.

3. საბჭოს შემადგენლობას ამტკიცებს ცაგერის მუნიციპალიტეტის მერი.

4. საბჭოს წევრობის კანდიდატის წარდგენის უფლება აქვთ:

ა) ცაგერის მუნიციპალიტეტის მოსახლეობის საინიციატივო ჯგუფს არანაკლებ 20 (ოცი) მოქალაქის შემადგენლობით;

ბ) მოქმედ მეწარმე იურიდიულ პირს, გარდა იმ მეწარმე იურიდიული პირისა, რომლის პარტნიორს/აქციონერს/დამფუძნებელს წარმოადგენს აღნიშნული მუნიციპალიტეტი;

გ) მოქმედ არასამეწარმეო (არაკომერციულ) იურიდიულ პირს, გარდა ცაგერის მუნიციპალიტეტის მიერ დაფუძნებული არასამეწარმეო (არაკომერციული) იურიდიული პირისა და იმ არასამეწარმეო (არაკომერციულ) იურიდიული პირისა, რომლის წევრსაც წარმოადგენს აღნიშნული მუნიციპალიტეტი.

5. საბჭოს წევრობაზე განცხადების მიღების თაობაზე ცაგერის მუნიციპალიტეტის მერის ბრძანება საჯარო გაცნობისთვის ქვეყნდება ხელმოწერიდან არაუგვიანეს მეორე დღისა მუნიციპალიტეტის ადმინისტრაციულ შენობაში სპეციალურად საჯარო განცხადებებისთვის განკუთვნილ ადგილას, ასევე, ქვეყნდება ადგილობრივ ბეჭდვით ორგანოში, რომელიც გამოიცემა კვირაში ერთხელ მაინც და ვრცელდება ცაგერის მუნიციპალიტეტის მთელს

ტერიტორიაზე, მუნიციპალიტეტის ვებ-გვერდისა და სხვა ინტერნეტ რესურსების გამოყენებით, რომლის მართვას ახორციელებს მუნიციპალიტეტი.

6. საბჭოს წევრობის კანდიდატს უფლება აქვს, ცაგერის მუნიციპალიტეტის მერს საბჭოს წევრად რეგისტრაციის შესახებ განცხადებით მიმართოს ამ მუხლის მე-6 პუნქტით განსაზღვრული ბრძანების გამოქვეყნებიდან 30 კალენდარული დღის ვადაში.

7. ცაგერის მუნიციპალიტეტის მერი საბჭოს დაკომპლექტების შესახებ გადაწყვეტილებას იღებს საბჭოს წევრად რეგისტრაციის შესახებ განცხადებათა მიღების დასრულებიდან 10 სამუშაო დღის ვადაში.

8. საბჭოს წევრად რეგისტრაციის შესახებ განცხადებათა მიღების დასრულების შემდეგ, თუ საბჭოს დაკომპლექტება ვერ ხერხდება ამ დებულებით განსაზღვრული წესის შესაბამისად, ცაგერის მუნიციპალიტეტის მერი უფლებამოსილია საბჭო დააკომპლექტოს საკუთარი გადაწყვეტილებით.

9. საბჭოს წევრთა არანაკლებ 1/3-ზე მეტის უფლებამოსილების შეწყვეტისას, 10 დღის ვადაში საბჭოს დასაკომპლექტებლად ცაგერის მუნიციპალიტეტის მერი უფლებამოსილია თავად დააკომპლექტოს საბჭოს შემადგენლობა ან/და გამოაცხადოს საბჭოს წევრობაზე განცხადებების მიღება ამ მუხლის მე-2 პუნქტის შესაბამისად.

10. საბჭოში ორგანიზაციული ნიშნით წარმოდგენილი წევრის ცვლილების უფლება აქვს მის წარმდგენ ორგანიზაციას. წარმომადგენლის ცვლილება არ იწვევს საბჭოში წევრი ორგანიზაციის წევრობის შეწყვეტას.

თავი მესამე

საბჭოს თავმჯდომარე, საბჭოს მდივანი, საბჭოს წევრი

მუხლი 7. საბჭოს თავმჯდომარე

1. საბჭოს თავმჯდომარეს საკუთარი შემადგენლობიდან დამსწრეთა უმრავლესობით, ფარული კენჭისყრით, 2 წლის ვადით ირჩევს საბჭო.

2. საბჭოს თავმჯდომარის კანდიდატურის წარდგენა შეუძლია საბჭოს 3 წევრს.

3. საბჭოს თავმჯდომარის არჩევნების ორგანიზებას უზრუნველყოფს დროებითი კომისია, რომელიც შედგება კანდიდატების წარმომდგენი საინიციატივო ჯგუფების თითო წარმომადგენლისგან.

4. იმ შემთხვევაში თუ წარდგენილია მხოლოდ ერთი კანდიდატი, არჩევნების ორგანიზებას უზრუნველყოფს კანდიდატის საინიციატივო ჯგუფის წარმომადგენელი და ცაგერის მუნიციპალიტეტის მერის მიერ უფლებამოსილი საჯარო მოხელე მისი საბჭოს სხდომაზე დასწრების შემთხვევაში.

მუხლი 8. საბჭოს თავმჯდომარის უფლებამოსილებები

1. საბჭოს თავმჯდომარე უფლებამოსილია:

ა) მოიწვიოს და გაუძღვეს საბჭოს სხდომებს;

ბ) ხელი მოაწეროს საბჭოს ოქმს და საბჭოს მიერ მიღებულ სხვა დოკუმენტებს;

გ) უზრუნველყოს საბჭოს გადაწყვეტილების ცაგერის მუნიციპალიტეტის მერისთვის წარდგენა;

დ) მოახდინოს საკითხის ინიცირება, მონაწილეობა მიიღოს დებატებში, დასვას შეკითხვები მომხსენებელთან და თანამომხსენებელთან, გააკეთოს განმარტება, განცხადება ან/და მიმართვა;

ე) ისარგებლოს ამ დებულებით დადგენილი სხვა უფლებამოსილებებით.

2. საბჭოს თავმჯდომარის საქმიანობა არ ანაზღაურდება.

3. თავმჯდომარის არყოფნის შემთხვევაში, მის უფლებამოსილებას მისივე დავალებით ახორციელებს საბჭოს ერთ-ერთი წევრი. ასეთი დავალების მიუცემლობის შემთხვევაში კი - საბჭოს მდივანი ან სხდომაზე არჩეული საბჭოს ერთ-ერთი წევრი.

მუხლი 9. საბჭოს თავმჯდომარის უფლებამოსილების შეწყვეტა

1. საბჭოს თავმჯდომარეს უფლებამოსილება შეუწყდება:

ა) საკუთარი განცხადებით;

ბ) საბჭოს წევრთა ნახევარზე მეტის გადაწყვეტილებით;

გ) საბჭოს წევრობის შეწყვეტით.

მუხლი 10. საბჭოს მდივანი

1. საბჭო საკუთარი შემადგენლობიდან დამსწრეთა უმრავლესობით, ღია კენჭისყრით, 2 წლის ვადით ირჩევს საბჭოს მდივანს.

2. საბჭოს მდივნის კანდიდატურის წარდგენა შეუძლია საბჭოს 2 წევრს.

3. საბჭოს მდივნის არყოფნის შემთხვევაში, საბჭოს მდივნის უფლებამოსილებებს მისივე დავალებით ახორციელებს საბჭოს ერთ-ერთი წევრი.

მუხლი 11. საბჭოს მდივნის უფლებამოსილებები

1. საბჭოს მდივანი:

ა) ორგანიზებას უწევს საბჭოს სხდომის მოწვევას;

ბ) საბჭოს სხდომის მოწვევის შესახებ განცხადებას/ინიციატივას დასარეგისტრირებლად გადასცემს ცაგერის მუნიციპალიტეტის მერიის ადმინისტრაციულ სამსახურს;

ბ) უზრუნველყოფს საბჭოს სხდომის ოქმის შედგენას და გაფორმებას;

გ) სხდომის ოქმს გააცნობს სხდომაზე დამსწრე წევრებს;

დ) უზრუნველყოფს სამოქალაქო მრჩეველთა საბჭოს დასკვნის შედგენას და გაფორმებას;

ე) ასრულებს სხდომის თავმჯდომარის მოვალეობას საბჭოს თავმჯდომარის არყოფნის შემთხვევაში ამ დებულების მე-8 მუხლის მე-3 პუნქტის შესაბამისად;

ე) ახორციელებს სხვა ორგანიზაციულ ფუნქციებს.

2. საბჭოს მდივნის საქმიანობა არ ანაზღაურდება.

მუხლი 12. საბჭოს მდივნის უფლებამოსილების შეწყვეტა

1. საბჭოს მდივანს უფლებამოსილება შეუწყდება:

ა) საკუთარი განცხადებით;

ბ) საბჭოს წევრთა ნახევარზე მეტის გადაწყვეტილებით;

გ) საბჭოს წევრობის შეწყვეტით.

მუხლი 13. საბჭოს წევრი

1. საბჭოს წევრი უფლებამოსილია:

ა) მონაწილეობა მიიღოს საბჭოს სხდომებში, მოახდინოს საკითხის ინიცირება, მონაწილეობა მიიღოს დებატებში, დასვას შეკითხვები მომხსენებელთან და თანამომხსენებელთან, გააკეთოს განმარტება, განცხადება ან/და მიმართვა;

ბ) შევიდეს და გადაადგილდეს ცაგერის მუნიციპალიტეტის ადმინისტრაციულ შენობაში მუნიციპალიტეტის მოსამსახურეთათვის დაწესებული რეჟიმის (სპეციალურის გარდა) შესაბამისად (ასეთის არსებობის შემთხვევაში);

გ) დაესწროს და წინასწარი წერილობითი მიმართვის გარეშე მონაწილეობა მიიღოს მუნიციპალიტეტის, ცაგერის მუნიციპალიტეტის მერის ან მის დაქვემდებარებაში მყოფი სამსახურების გამართულ საჯარო სხდომებში, დებატებში, დასვას შეკითხვები მომხსენებელთან და თანამომხსენებელთან, გააკეთოს განმარტება, განცხადება ან/და მიმართვა;

დ) შეხვდეს მუნიციპალიტეტის თანამდებობის პირებსა და საჯარო მოხელეებს, გამოითხოვოს და მიიღოს საჭირო ინფორმაცია საბჭოს უფლებამოსილებასთან დაკავშირებულ საკითხებზე;

ე) საბჭოს და ცაგერის მუნიციპალიტეტის მერს წერილობით წარუდგინოს თავისი შენიშვნები და მოსაზრებები;

ვ) ისარგებლოს ამ დებულებით დადგენილი სხვა უფლებამოსილებებით.

2. საბჭოს წევრის საქმიანობა არ ანაზღაურდება.

მუხლი 14. საბჭოს წევრის უფლებამოსილების შეწყვეტა

1. საბჭოს წევრს უფლებამოსილება შეუწყდება თუ:

ა) სასამართლოს მიერ აღიარებულია გარდაცვლილად ან უგზო-უკვლოდ დაკარგულად;

- ბ) მიმართა საბჭოს თავმჯდომარეს საბჭოს წევრობის შეწყვეტის განცხადებით;
- გ) არასაპატიო მიზეზით ზედიზედ 3 სხდომაში არ მიუღია მონაწილეობა;
- დ) სასამართლოს ძალაში შესული გამამტყუნებელი განაჩენით მიესაჯა თავისუფლების აღკვეთა;
- ე) გარდაიცვალა;
- ვ) განხორციელდა საბჭოში მისი წარმდგენი იურიდიული პირის ლიკვიდაცია.

თავი მეოთხე

საბჭოს სხდომის მოწვევა და გადაწყვეტილების მიღება

მუხლი 15. საბჭოს სხდომის მოწვევის უფლების მქონე სუბიექტები:

საბჭოს სხდომას იწვევს ცაგერის მუნიციპალიტეტის მერი საკუთარი ინიციატივით ან საბჭოს თავმჯდომარე საკუთარი ან საბჭოს წევრთა არანაკლებ 1/3-ის ინიციატივით.

მუხლი 16. საბჭოს სხდომის მოწვევა

1. საბჭოს სხდომა იმართება 3 თვეში ერთხელ მაინც. საბჭოს მორიგ სხდომას იწვევს საბჭოს თავმჯდომარე ამ მუხლის მე-3-მე-5 პუნქტებით დადგენილი წესით.
2. საბჭოს პირველ სხდომას საბჭოს შემადგენლობის დამტკიცებიდან 10 კალენდარული დღის ვადაში იწვევს ცაგერის მუნიციპალიტეტის მერი ამ მუხლის მე-3-მე-5 პუნქტებით გათვალისწინებული წესით.
3. საბჭოს სხდომას იწვევს საბჭოს თავმჯდომარე ან თავმჯდომარის არყოფნის შემთხვევაში **საბჭოს მდივანი ან საბჭოს წევრი, რომელიც ასრულებს თავმჯდომარის მოვალეობას**. სხდომის მოწვევის შესახებ განცხადება რეგისტრირდება ცაგერის მუნიციპალიტეტის მერიის შესაბამის სამსახურში სხდომის გამართვამდე ერთი კვირით ადრე მაინც.
4. სხდომის მოწვევის შესახებ განცხადებაში უნდა აღინიშნოს:
 - ა) სხდომის გამართვის თარიღი, დრო და ადგილი;
 - ბ) სხდომის დღის წესრიგი და განსახილველი საკითხების ნუსხა;
 - გ) სხდომის გამართვისთვის საჭირო მატერიალურ-ტექნიკური საჭიროებების შესახებ ინფორმაცია.
5. საბჭოს სხდომების გამართვის მატერიალურ-ტექნიკურ მხარდაჭერას სრულად უზრუნველყოფს ცაგერის მუნიციპალიტეტის მერიის **ადმინისტრაციული** სამსახური.
6. საბჭოს სხდომის მოწვევა შეუძლია ამ დებულების მე-15 მუხლით განსაზღვრულ სუბიექტებს. სხდომის მოწვევის ინიციატივას ხელს აწერს სხდომის მოწვევის ინიციატორი, ხოლო სხდომის მოწვევის საბჭოს წევრთა არანაკლებ 1/3-ის ინიცირების შემთხვევაში, თითოეული წევრი ცალ-ცალკე.

მუხლი 17. საბჭოს მიერ გადაწყვეტილების მიღება

1. საბჭოს სხდომას წარმართავს საბჭოს თავმჯდომარე.
2. საკითხის ინიცირების უფლება აქვს საბჭოს წევრს, საბჭოს თავმჯდომარეს და ცაგერის მუნიციპალიტეტის მერს.
3. ცაგერის მუნიციპალიტეტის მერი, **მერიის თანამდებობის პირები და მერის წარმომადგენლები** უფლებამოსილი არიან დაესწრონ სხდომას სათათბირო ხმის უფლებით.
4. საბჭო უფლებამოსილია თუ სხდომას ესწრება წევრთა ნახევარზე მეტი.
5. საბჭო გადაწყვეტილებებს იღებს დამსწრეთა უბრალო უმრავლესობით.
6. საბჭოს გადაწყვეტილება ფორმდება საბჭოს სხდომის ოქმით, რომელსაც ადგენს სხდომის მდივანი.
7. საბჭოს სხდომის ოქმში უნდა აღინიშნოს:
 - ა) სხდომის გამართვის თარიღი, დრო და ადგილი;
 - ბ) სხდომის დაწყების და დასრულების დრო;
 - გ) სხდომაზე დამსწრე საბჭოს წევრების სია;
 - დ) სხდომის დღის წესრიგით განსახილველ საკითხთა ნუსხა;
 - ე) სხდომაზე განხილული საკითხები და კენჭისყრის შედეგები;
 - ვ) სხდომაზე მიღებული გადაწყვეტილება.
8. საბჭოს სხდომის ოქმს ხელს აწერს საბჭოს სხდომის თავმჯდომარე და უზრუნველყოფს მის მიწოდებას ცაგერის მუნიციპალიტეტის მერისთვის.
9. საბჭოს მიერ მიღებული გადაწყვეტილება სარეკომენდაციო ხასიათისაა და მას სავალდებულო ძალა არ აქვს.

თავი მეხუთე

დასკვნითი დებულებები

მუხლი 18. დასკვნითი დებულებები

1. დებულებაში ცვლილება შეიძლება განხორციელდეს მერის, საბჭოს თავმჯდომარის ან საბჭოს წევრის ინიციატივის საფუძველზე.
2. დებულებაში ცვლილების შეტანა ან მისი გაუქმება ხდება ცაგერის მუნიციპალიტეტის მერის ბრძანებით.